

上清太上開天龍蹻經卷之一

達六

黃帝請問甯君訣第一

軒轅黃帝夙植仙津上感神精誕靈特秀位承天帝復道求真清齋玄闕越雲臺山拜參甯君請問三洞曰朕承洪緒雖統萬機每請

真要奉修玄旨心形本躁聖道幽微與理虛

疑未能玄悟洞玄靈寶五篇通生洞神仙經

普垂色像大洞聖教義貫虛无託曾通虛三

寶齋稟凡情感滯至道難明三洞通生通同

一不甯君答曰玄元始氣三洞玄根三清三界

普垂應體仙真聖位九品玄階三洞混通應

感有異歷劫應化三寶齋臨高聖下凡隨機

降授上聖傳道應說離言中真傳德寄言通

理下界傳經因言修習開度有賢三等斯別

黃帝再拜跪請啟白敢問其道三品互差願

示其要令无疑惑

甯君告曰三境三界通礙見殊高聖下凡悟

有深淺洞通无礙名為三洞三洞通方感報

不等言上聖傳道者至道玉帝於龍漢劫時

應為天寶大洞聖君上生玉清十二聖天當

傳聖道而與鬱單天帝九天丈人禪善天帝九天真皇須延天帝元始天王各教三天九品聖道赤明劫時應為洞玄靈寶真君次生上清十二真天傳於真道而與寂然天帝元始先生不驕樂天帝高上元皇應聲天帝虛

皇玉帝各教三天九品真道上皇劫時應為神寶洞神仙君次生太清十二仙天傳於仙道而與梵輔天帝萬始先生清明天帝紫虛帝君无愛天帝太真五皇各教三天九品仙道此是上聖而傳其道也言中真傳德者太

易時傳授太帝君太始時傳授天帝君靈陽子太初時傳授太微帝君太極時傳授太微天帝君太素時傳授金闕後聖太平李真君上相素童君上相青童君九玄帝君此是中真而傳其德也言下界傳經者應化法門十

二等事一者本文三洞宣說二者神符奉宣告信三者玉訣示无疑難四者靈圖圖寫相好五者譜錄歷代授道六者戒律防非禁惡七者威儀序秩格八者方法修行節度九者術數隱景貴形十者記傳傳示學人十一

者讚頌歌誦聖德十二者章表章請表奏三洞通達應感證緣三乘積功證果亦別隨功高下上生諸天諸天果報乘經說證三十六部證品生天三十六天隨經修品上證道果因有教修解脫有緣自然正性也

黃帝再拜又重啟曰三十六部三品應緣三十六天隨經修品經證天品依經生天三品感經凡情暗弱未曉道源證品通不甯君告曰三洞經法天尊相門應感通生皆從相立身光洞耀朗徹太空境界天人咸皆

稟植三寶應象九帝翼形妙有通滋始成神識神清智朗志鑿慧明氣濁神昏暗彰斯起體洽大道境界通玄靜念身神三清洞合八景保舉真象雲耕九天翼形潛昇淨境三十六部洞瑩爾身三十六天念隨心克諦聽吾言方為汝說

甯君告黃帝曰至道无象无形无名從本降跡漸顯三身從起三身而演三洞三境三界凡聖顯差九天九人感象通貫三寶漸頓三乘接生皆起法身身光相好三身相好境界

垂形應感天人同滋獨象皆從相好而植其神上稟玄精始成妙用

第一法體玄微幽微真一妙智清淨无礙上顯法體三十六門應演三洞三十六相上下相合七十二相

第二應身應體顯象三界三界上下圓明降氣生神而成靈識无量功德福備人天應感業緣隨功證宅上顯三境三十六天下應三界三十六帝上下通應七十二相

第三化體開化人神皆含三洞九氣生育倣天象地合為識靈內顯化身三十六相外示生人三十六相內外相合七十二相三十六部是无相源從理寄言令銓其理應生境界福備十方歸根返本以立階品證果進位超昇大羅體解大道入真實際圓滿清淨澤被黎民善開方便示有為法通生妙用而起識神萬化應緣一相空靖也

甯君告黃帝曰窈寂法身而生空洞空洞之內而生太源太源之化三氣生焉上氣曰始中氣曰元下氣曰玄玄氣所生出乎元元氣

所生出於始此氣之本宗於象帝之先故曰玄元始氣也玄元始氣三境玄根上應三境而立三尊中生三界三乘接引通為三元生人三官故此三氣品施生焉三生萬有根源本始也

甯君告黃帝曰三清天中玄元始氣以三合五化為八景神各生八方而為二十四帝者上為三清二十四宮紫虛仙府降為四梵四八化生各為三界二十四宮善為一天二十四氣內生人身二十四體故此三元三部八景二十四帝帝各三元元各五神合為三百六十神六六品族合氣生神上為三清六十四梵氣二六相合三十有二降生三界三十二天普通一天三十二帝二十八宿璇璣玉衡故生一天三百六十日一月三百六十時一地三百六十名山一人身中三百六十骨也甯君告黃帝曰玄元始氣合生九氣故為九帝上為九天中生九天下為九地諸天九聖皆備形神生人九戶稟道生立又生比地九野分方上通五帝四運周緒九氣列正陰陽

五行人民品物並受成生也甯君告黃帝曰三清九天各生八方而為七十二宮三元各有二十四帝上為二十四真中為二十四神下為二十四生三元八景品族生神合中九宮八十有一通生諸天八十一分普生諸地八十一域內生人身八十一關節也

甯君告黃帝曰正一大道以出真帝正一玄真而生大神三元解變則一之所生故玄功歸一萬事生焉此至道之祖宗元氣之根始也從本降跡普植形神因无名立有名寄有名詮无名通為境界應氣生神三洞通化以為天尊三公天也九天通化應為天尊九洞天也仙真聖位各證九品故有三九二十七位故為天尊二十七大夫天也九天初構上下重疊及其分應則列八方故有九九八十一位故為天尊八十一元士天也通前三公九卿二十七大夫八十一元士各生氣象故為天尊百二十郡天也又於百二十郡等天內為五百外為五官各生十神合為天尊千二百縣

官天也又於千二百縣中各有三元元各五鄉故為天尊萬八千鄉天也又於萬八千鄉天各稟五氣以為五天亭故為天尊三萬六千亭天也又於三萬六千亭中亭各五候合為天尊十八萬候故此官屬通生諸天又備人神各稟氣象並得安立而植生根紫戶玉關三萬六千關節根源本始一時生神也寶君告黃帝曰吾昔承玉帝開天上經三洞法門萬化根始降生境界而植形神應感眾靈普稟官屬三清上境三洞玄根下生三界。二景通合四緒御運五氣遊與百六數交劫有主滅諸天壽限高下不同隨功證報見有差別故演三洞道君奉宣當度有賢歷劫開受汝今請問向序應生諦聽吾言示汝寶訣元始開化通貫天人身生相好境界通稟虛无應體寄象立言因有發修方登空寂三洞接引九品降差妙極道源冥通玄一體解幽曠識朗慧微三清妙門俯念斯感寶君告黃帝曰吾昔承大帝昔往初劫龍漢開闢內溟混沌十號化身託述諸天成立諸

法離言說道无礙生津天中之尊无形化生於大羅天明霞觀中而演三洞三十六部降生三境三十六天三洞法門萬行根始下生三界品物流形八方已下各生五億五萬五千五百五十五億等无極三界比地等天八方皆有三千大千世界无極三界皆稟三清三元上下三十六天每天四方四九列位上應天璣三十六門普為比地三十六音一塵之內三十六氣天人相感同稟道生三十六地嚮象通感三洞通化凡聖有殊應感隨機。復有九種上下聖教上通玉清中上真教次通上清下上仙教次通泰清上中聖教次通无色中真教次通色天下中仙教次通慈界上下聖教下接利根中下真教下接平根下下仙教下接鈍根三乘漸頓三根不同三界天人三寶接引三清聖教三洞玄階上帝道鄉曠理虛漢通生妙有諸天良梯道性虛疑不生不滅无來无去顯象妙門恍惚隨迎示真寶法諸天受樂從有發修因緣行業根本果始證果超拔從此六門慈悲善思四等

俱備雌柔懇信諫諍止息耽行有德心捨无德念念增廣福德慧隆天眼了達察无相思想既已去色形又无捨識增修无有勞動既无動作輕塵都忘超世生滅至四人境壽福浩劫无礙化身託下救凡積功昇進昇玄證果又登四梵漸昇太清登入九仙次昇上清登入九真次昇玉清昇入九聖上至聖上上聖界功德充滿昇道入无忘功忘果自然正性與道混合冥會虛空天尊通身常住湛寂寶君告曰三洞開化普植天人一切官屬。咸皆稟受有物生主无形常存境界應身皆為天帝普為上下三十六天尊又於比地三十六音主諸天世界通含三十六帝形下地上方通管三十六音氣三十六部普度无崖三十六天昇進階品三清聖象妙寂常常三界九地四運遙遠三界劫壞混沌无生三清三寶更降元氣每劫重造三氣為宗三寶通生九運不等故无色界上元頂天其天氣相交三千三百度為小陽九小百六其天氣相交六千六百度為中陽九中百六其天氣相

交九千九百度為大陽九六百色慾下界與上互差下短上長歲月有異其上无色天氣相交三千三百度次下色界中元頂天即有六千六百度又下慾界下元頂天加有九千九百度其上无色小陽九其中色界中陽九其下慾界大陽九其下慾界萬劫齊粉其中色界百迴劫壞其上无色一迴普及於慾界九土亦異天地相交三千三百度三土受衰水火兵病飢饉餓死六千六百度六土受害九千九百度九土並損故顯太一布氣流行太歲宮氣更相之適遍被家國內及人身所至之宮隨神見疾三期逆順交錯八方三十六載十二周滿此是小會積數成災轉讀是經方免斯患大小劫會九氣終時業果不定上下報異

上清太上開天龍蹻經卷之一

上清太上開天龍蹻經卷之二

建七

三洞通生元置品第二

是時黃帝拜參甯君請問三洞尊經三品傳道啓問說已又拜稽首復請訣曰三洞尊經上生三境三十六天三十六部既生境界各有三十六天三十六天亦是三十六部以下甯君答曰玄元始氣三境玄根三十六部生天法宅三洞降德為天人之生主九聖通化為象帝之玄根三十六部為境界之生門三十六天為入道之階品故因經以開導明氣象以通於經開徑路以證道鄉藉證修而登聖果淨身神以通道境修盟約以祛惑情三十六部洞觀齊臨三十六天隨心嚮應三清上境下界應緣三界昇墜助在心首階品不_等故立界名隨根應感凡有五種諦聽吾言方為汝說

甯君告黃帝曰吾昔承道主生化法王天中之尊皆悉稟受初降妙一聖化初始始生於元元通真道元生於玄玄主仙教仙真聖位三洞玄尊三寶立位三號亦別故於龍漢初

時元始開圖應為玉清天寶聖君號為大洞无形天尊而說大洞十二部經而教玉清十二聖天次於赤明劫時應為上清靈寶真君號為洞玄无名天尊而說洞玄十二部經而教上清十二真天次於上皇劫時應為奉清神寶仙君號曰洞神元始天尊而說洞神十二部經而教奉清十二仙天三十六部經生於諸天天人稟受故名三界三乘漸頓接引通方開度有賢應身降受歷代教化天尊通神三洞寶經隨方顯用

甯君告黃帝曰元始應身七十二相上生三境下生三界皆稟三洞品物流形生天元始故稱天尊三十六部天尊化體三界之內三寶接生應感不同故為无色色慾界也又為衆生根性參差雖同一天咸有五種一者三洞三界二者應化三界三者反出三界四者流來三界五者輪迴三界言三洞三界者三十六部上生三境三十六天中生三界三十六部下生九聖三十六土皇天人相通三乘接引精氣相貫皆稟三洞善質得生也其二